



Lisolo ya bomoyi ya Mokonzi ya Ekolo Félix-Antoine Tshisekedi Tshilombo



Abotama na mwa 13 sanza ya motoba 1963 na Kinshasa. Félix-Antoine TSHISEKEDI TSHILOMBO azali moko ya bansomi-bakonzi ya République Démocratique du Congo (Ekolo Kongo ya Bolobani – RDC). Akomaki Tata-mokonzi ya Ekolo uta mwa 24 ya sanza ya yambo ya mobu 2019. Moko ya bayangeli ya likolo ya lingomba UDPS (Union pour la Démocratie et le Progrès Social – Lisanga po na bolobani pe bopusani ya bomoyi ya bato na mboka), lingomba oyo tata na ye akambaki. Ye oyo asila kozongisa molimo, totangi bongo Etienne TSHISEKEDI. Na mobu 2011, ndeko Félix aponamaki lokola Molobeli na ndelo ya Ekolo. Bamolongolaki na etinda yango na mobu 2013 kolandana na ndenge aboyaki kofanda na ngwende na ye na Likita ya Ekolo. Aboyaki po na kobimisa na mpwasa lokuta oyo esalamaki na tango ya maponomi.

Na sima ya liwa ya tata na ye, na sanza ya mibale ya mobu 2017, ndeko Félix akomaki Tata mokonzi ya lingomba «Rassemblement ». Na sanza ya misato ya mobu 2018, na likita ya mbalakaka ya UDPS, bamoponaki bongo Tata-Mokonzi ya lingomba. Azali moko ya babandisi Dialogue Congolais pour le respect de la Constitution et pour l'alternance pacifique en RDC (Masolo ya bayi-Kongo po na botosi Mobeko-Likonzi pe bokitani ngala na kimya na RDC). Abundeli bosalameli yango na komipesa makasi kino etindaki ye, na Nairobi, na sanza ya zomi na moko ya mobu 2018, aya kokangana na Union pour la Nation Congolaise (Lisanga po na Ekolo Kongo – UNC) ya ndeko Vital Kamerhe. Boyokani wana ememaki bango na

kokela etandolelo po na maponomi « CACH » (Cap pour le changement – nzela po na mbongwana). Ezalaki bongo na sanza ya zomi na mibale ya mobu 2018.

Na mwa 30 ya sanza ya zomi na mibale ya mobu 2018, bamoponaki Tata Mokonzi ya Ekolo po na etinda ya mbula mitano. Na mibu 55, akomaki bongo Mokonzi ya mitano ya République Démocratique du Congo (Ekolo Kongo ya Bolobani), na nzela ya bokitani ngala oyo esalamaki po na mbala ya liboso na ndenge ya kimya na mboka ya monene koleka bamboka nyonso ya Afrique centrale (Afrika ya kati-kati).

Na mwa 09 ya sanza ya mibale ya 2020, Félix-Antoine Tshisekedi Tshilombo aponamaki na ebonga ya Mokonzi-molandi ya Lisanga ya Afrika po na mobu 2020. Bamoponaki pe libela, po na mobu 2021, bo Mokonzi ya lingomba yango. Bato baponaki ye ezalaki bongo baninga na ye batata-bakonzi. Maponomi yango masalemaki na Likita ya mbala ya tuku misato na misato oyo esangisaka batata-bakonzi ya Bikolo pe ya baguvernema. Likita yango esalamaki bongo kobanda mwa 09 kino 10 ya sanza ya mibale na engumba Addis-Abeba, mboka-mokonzi ya Etiopia.